

养一斋集

卷一

一

卷一

卷一

養一齋集卷之九

山陽潘德輿彥輔

丙申年

仲秋之秣陵省止泉舅氏登舟述感

人生重知己肅然況我師我師母昆弟愛我同仁慈我年
十八九舅自京華歸當代稱宗工寂寞元亭開我方悲蓼
莪俛俛迷所之銜涕往問經謂我長文辭此事今推袁大
語了不疑豈料卅載餘慚負無瑰奇虛名挂人口覈實多
瑕疵輪蹠凋鬢須身世曾何裨嗒焉念我舅視我當益衰
八年不見面魂夢常往來魂夢恨倘恍書尺勞雁飛不如

一葉舟徑下無威遲五日可渡江叩門升堂階四海此舅
甥頭白猶相依青山照綠酒色笑交愉怡毋言老懷惡真
樂方在茲

秣陵我初游其時十六七綵衣侍杖屨奇氣自噴溢轉瞬
風木悲悲痛難殫述長江十二渡秋鶚翼始刷春官疊被
放我馬疲不歇幽州朔氣嚴雪片化毛髮朱門士鱗萃塵
上掩白日性褊恥奔走胸次堆崛砢南望江介山浮嵐抱
城闕少壯苦備嘗此境濯吾骨我舅澹榮利寓公乃築室
鍾阜蟠煙霞取爲駐顏術從之叩元遠冠蓋眞外物卻憶
童孺年出門傍親膝孤兒淚在眼年光悵飄忽再拜我舅

前天倫等親密從來骨肉恩窮老戀尤切長歌復三嘆葦
風夜蕭瑟

八月十三夜寶應對月

昨夜吾鄉月吹來八寶城故交在天際謂孔生河漢向人明

叢葦藏漁火高樓落雁聲此邦問耆舊喬木已榛荆故鴻博侍講喬公萊爲吾潘氏甥今其宅歸朱尙書

十四夜高郵對月

雙槩閣煙漱百蟲喧夜隄月華憐漸滿珠彩望終迷樹擁
孤城暗天圍大澤低文游客非昔旅泊句慵題

十五夜揚州對月

卷一 齊集
綠楊應記我三十度揚州雲水一揮手重來雪滿頭隋隄
猶月色歌吹寂中秋翻爲居人喜清貧省宴游
近鹽務折閱民進水災

金山舟次感興

我從淮南來漫漶無高原河湖互爭地那見坤維尊大江
日夜下萬狀驕瀾翻勃然一峯起雖小鐵甕門怒濤擊四
周檣空鎮魚鼃羣山但拱揖無此萬古根豈惟制百怪南
服爲屏藩倚山劃一嘯身若橫海鯤揚州麗煙月滌盪歸
雄渾臨川歎抑塞濟世嗟徒論浮雲蔽蓬萊千里傷羈魂
思登高臺顛驪首攀天閭雲扉叫未開文豹當頭蹲愧彼

古頭陀石室坐不言迴橈且酌酒醉卧荒江村

新河舟中

雲濤片席過愛此波恬舒兩厓及尋丈水色彌有餘江邨
人宴歸林密風蕭疏眾鳥散平疇遠霞照蓬廬山椒幾葉
飛秋氣激太虛田禾亦已穫兒童寒澗蔬涉覽發長慨塵
鞅良超超浦橈不忍發嵐嶺將卜居

晴窗對岸啓雲木非一族居人養愚蒙清暉自然足老龍
安深潭江靜睡亦熟縹緲攝山峯孤樹表秋綠跳泉清昔
聽浮靄快今矚已似香臺下松濤動僧屋樵夫笑指路夕
陽遞川陸言尋舊禪牀蒼苔踐幽躅

謁方正學祠遂至壽池山房

建康郭外萬山合木末一亭依太清老子閒游多古意大
忠餘憤作江聲春秋事不問家國師友倫原共死生草草
六朝同傳舍詞章幾輩是時英

含淚高歌授命辭下山草木有餘悲復登傑閣一憑眺誰
似長江無盡時萬壑秋聲儘蕭瑟孤峰日色未迷離長干
賦別銷魂地獨有茲游慰我思

奉別止泉舅氏

見難別苦易此別況衰顏骨肉一江隔煙波雙淚還更聲
促柁酒鐙影戀柴關北固登高日吟魂在蔣山

江舟贈別盧斌夫

江流日夜東萬態迭新舊昔別君未婚杜送我涕霑袖今

來君產兒顧我貌益瘦我爲幽燕客體尪志不就君居佳

麗都氣質善矯揉弱冠文史場不逐裙屐秀聞歌急迴槩

輓彊決志穀銅丸飛深宵銀刀爛白晝頗鍊封侯骨痛刷

豎儒陋狂歌拂雄劒獨立古賢後袞袞篷窗談膽識狹宇

宙晚泊石頭郭風雨谷懸濤大江曉色動洪濤萬馬驟開

襟爲君酌勛君業日富丈夫廓樹立匪以智力鬪將此赤

子心衽席溥在宥彫剋喟滿眼瘡痍恃誰救翩然大纛過

伐鼓津吏候安知繩樞中九月衣未授我滯若病驥秋風

卷一 齊集
四
臥殘廢君爽如快鵲霜翮養豐茂惡鳥擇一擊啁噍獲老
壽挺挺仁者勇家學標世胄望深言苦長年盛願須副岐
塗腸九迴欲行睂屢皺邗江計乖分潤州姑宿畱金焦攬
江海泱泱極天覆共持茱萸酒胸腹濯塵垢快意百年僅
此別幾時覲沿江折衰柳清淚漬衣透

寄陸藝林太常

不見太常今幾年燕山南望阻風煙每慚阿士文章美

藝林

爲止泉
舅婿

深識秦嘉夫婦賢君得黃花關老屋我隨秋雁落

江天延令只在雲低處把酒臨流意邈然

京江舟次雜書

宮殿銀山最上頭坐看千里雪濤流阻風中酒年年事又
倚江南一寺樓

四圍山色扶仙閣萬古江聲入酒杯

飲銀山道士山閣上

醉倚危欄

問羽客聽琴多少大魚來

道士善琴

黃葉西風送遠鴉雲天一角是吾家江山如此英雄盡歸

掩柴門對菊花

揚州訪毛子喬

大息毛生老齊名少小時朱顏終勝我喜色乍生兒

子喬今年

五十八乃得子

秋雨依螢苑春雲隔鳳池平山菊可把解纜復相

思

灣頭夜泊

隋代山光寺月高僧閉關茱萸灣上泊不見江南山石牖
水何怒江聲到此閒臥參喧寂理身定夢魂閒

過湖

飢雁雨猶叫蘆花秋自開人家未盡處湖水接天來

野雁

野雁風吹下飛飛近我舟尙存霄漢念豈善稻粱謀朔漠
半年雪南天萬象秋忍寒是汝分安穩伴沙鷗

野航

野航閒載我豈博濟川名樵牧能相狎波濤那用驚天青

弄雲水月暗識柴荆不繫真慚汝值個多世情

寄鏡渠

夏木繞君屋續續陰酒樽霜氣一以冽枝幹今何存我從
江介來落葉堆千村但見古山色蒼翠銜朝暾相思阻煙
水朔雁空飛鶩江濤日東下天道余何言

寒鐙照我心先哲起晤語萬卷圍兒童一觴剖今古畧具
甌石儲老子豈出戶溝壑終懷疑潛躍匪泰宇眼中鳶魚
妙飄忽若風雨往問三徑朋何術慰環堵

寄小庾

青雲高復高碧海深復深青雲不扶翼碧海可洗心海濱

田雖腴耕作力足任老親植藜杖稚子依書琴蓬廬煙火
通濁醪時一斟直北眺 丹闕羣鳳游芳林物生但飲啄
何者爲升沈大東浩滄波釣竿垂自今

竿綸雖云樂肥遯嗟非時豈有萬斛舟濟川終無期天河
流西南光耀徹四陲如何烏鵲毛橋梁命之爲俯釣六巨
鰲仰觀搏桑枝赤日吐暘谷羣陰埽離披將子且安坐泱
泱相娛嬉

清娛惜芳辰衰白別太苦燕臺一片月飛來我庭戶密坐
四海英揮手散如雨精誠與纏緜山川宛修阻野鴉叫衡
門高雁逝煙渚美人蘭漿遙西風淒蘅杜白日去不淹獨

立愴萬古竹老實未結歲晏益愁予
翬翬金石心荒遐其
時序

寄葉生

嶺南江右兩老翁

香鐵羽可

飄然去我如飛蓬漢北少年尺書

至指眼疾讀心忡忡京華軒幘走落驛何爲眷此山林客

三月不見入君夢我文一通長在壁文章豈足了君事邈

邈前修其肝鬲寒霜垂空萬星溼風吹我心往趙北淮流

潏沉橫我前几上瑤琴韻酸惻卻思老友雙淚流嶺雲漠

漠江悠悠勸君青鬢莫懷友風雨愁多易白頭

生有風雨懷人圖

題子履山水冊卽送之歸鎮洋

周道起飈塵黯黯不得語山川爾何物天地啓靈府裏糧
往從之關河易風雨煩憂紆復結塵埽汝累予

塵埽不可祛矧將別我友別我問安之故山有百畝大海
濤其東邱壑自潛守煙雲千里深孤鶴可回首

孤鶴欲南下白雲空裴裊不見谿山閒煙雨藏高齋或有
綺與角千載相往來古人尙不隔竝世何離懷

離懷日夜長欲語還默默驅車覽四方不如日居息天寒
霜霰多朱鳳亦垂翼去去勿復陳努力向泉石

子幹南歸過淮詩以誌別

竹屋斜陽鳥獨語夢裏佳人在南浦幽燕北風馬嘶健復

送高帆過吳楚欲行不行默凝佇期我河梁話離緒柴門
乍曉喚人覺箴舫輕寒伴鷗去鷗汀曲曲閒可娛谿翁三
五眞吾徒雙耳不納六合事瓦盆爛醉爲唐虞黃生君來
從上都飽聞皋契陳訐謨英年奮氣起射策瓊枝白璧天
下無荆山好定萬鎰價何爲蓄寶還鄉閭大江濤聲夜如
吼廬山積雪射南斗看君鶴氅有寒色淮陰肆上呼杯酒
卻憶長安酒肆人紛紛散漫如飛塵我手漁竿不復棄君
腰寶劍終有神撫劍高歌極惆悵落日高城臨莽蒼太行
左右螭螭來千里江田可無恙黃生黃生歸路賒青山供
汝早梅花春風吹到江南雁先過淮干漁父家